

Na osnovu člana 14. i člana 70. stav 3. Zakona o električnoj energiji («Službene novine Federacije Bosne i Hercegovine» br. 41/02), člana 5. Statuta Regulatorne komisije za električnu energiju u Federaciji Bosne i Hercegovine («Službene novine Federacije Bosne i Hercegovine» br. 13/04), člana 50. stav 1. Poslovnika o radu Regulatorne komisije za električnu energiju u Federaciji Bosne i Hercegovine («Službene novine Federacije Bosne i Hercegovine» br. 59/04), i člana 24. Pravilnika za izdavanje dozvola za rad-licenci Regulatorne komisije za električnu energiju u Federaciji Bosne i Hercegovine («Službene novine Federacije Bosne i Hercegovine» br. 29/05), Regulatorna komisija za električnu energiju u Federaciji Bosne i Hercegovine – FERK na V redovnoj sjednici održanoj dana 08.04.2009. donosi

**PRAVILNIK
ZA IZDAVANJE DOZVOLA ZA RAD - LICENCI
ZA PROIZVODNJU ELEKTRIČNE ENERGIJE ZA VLASTITE POTREBE**

DIO PRVI - OPŠTE ODREDBE

**Član 1.
(Predmet)**

- (1) Ovim Pravilnikom Regulatorna komisija za električnu energiju u Federaciji Bosne i Hercegovine-FERK uređuje postupak, kriterije i uslove za izdavanje dozvola za rad-licenci za proizvodnju električne energije za vlastite potrebe:
- a) za proizvodna postrojenja koja ne isporučuju električnu energiju u distributivnu mrežu,
 - b) za proizvodna postrojenja instalisane snage do 23 kW čija je proizvodnja namijenjena prvenstveno za zadovoljenje vlastitih potreba, a koji mogu eventualne viškove proizvedene električne energije isporučivati u elektrodistributivnu niskonaponsku mrežu.
- (2) Agregati sa motorima sa unutrašnjim sagorjevanjem ne smatraju se proizvodnim postrojenjima u smislu ovog pravilnika i ne podliježu obavezi pribavljanja dozvole za rad .

**Član 2.
(Sadržaj pravilnika)**

Ovim Pravilnikom propisuju se:

- a) osnove postupka za donošenje odluke po zahtjevu za dozvolu,
- b) sadržaj zahtjeva za dozvole,
- c) kriterije za izdavanje dozvola,

- d) uslove za izdavanje dozvola,
 - e) sadržaj dozvola,
 - f) zahtjeve za izmjenu, dopunu i oduzimanje dozvola,
 - g) registar/evidenciju dozvola,
 - h) uslove nadgledanja.
- (2) Postupak izdavanja dozvole je javan i vodi se u skladu sa objektivnim i javnosti poznatim kriterijima na nediskriminirajući i transparentan način.
- (3) FERK je dužan konsultovati se o uslovima svake dozvole prije izdavanja dozvole i pozvati zainteresovane strane da daju komentare na nacrt dozvole kroz proces javne rasprave.

Član 3. (Cilj)

Cilj ovog pravilnika je da se utvrdi i obezbijedi brz, efikasan i ekonomičan postupak o pitanjima izdavanja dozvola iz člana 1. ovog pravilnika.

Član 4. (Definicije)

Definicije koje se koriste u ovom Pravilniku su definicije iz Zakona o električnoj energiji, Poslovnika o radu FERK-a i Pravilnika za izdavanje dozvola – licenci.

Član 5. (Zahtjev za izdavanje dozvole – licence)

- (1) Lice koje namjerava proizvoditi električnu energiju za vlastite potrebe u vlastitim proizvodnim postrojenjima bez namjere da eventualne viškove proizvedene energije isporučuje u elektrodistributivnu mrežu, dužno je podnijeti FERK-u zahtjev za izdavanje dozvole za rad – licence za djelatnost proizvodnje električne energije za vlastite potrebe.
- (2) Lice koje namjerava proizvoditi električnu energiju za vlastite potrebe u proizvodnim postrojenjima instalisane snage do 23 kW i viškove proizvedene električne energije isporučivati u elektrodistributivnu mrežu, dužno je podnijeti FERK-u zahtjev za izdavanje dozvole za rad – licence za djelatnost proizvodnje električne energije za vlastite potrebe.
- (3) Zahtjev za izdavanje dozvole za rad – licence pregledat će nadležni sektori FERK-a u skladu sa kriterijima navedenim u Zakonu i ovom pravilniku. Podnosilac zahtjeva za dozvolu ima odgovornost da dokaže da ispunjava sve kriterije za izdavanje dozvole i da poštuje sve standarde dozvole.
- (4) FERK u dozvolu uključuje sve uslove koji su potrebni za obezbjeđenje ciljeva Zakona i ovog pravilnika.

Član 6.
(Period važenja dozvola)

Period važenja dozvole za rad-licence za proizvodnju električne energije za vlastite potrebe je deset godina ukoliko nije kraće tehničko ograničenje postrojenja definisano od strane proizvođača opreme.

DIO DRUGI-POSTUPAK ZA PODNOŠENJE ZAHTJEVA ZA IZDAVANJE DOZVOLE ZA PROIZVODNJU ELEKTRIČNE ENERGIJE ZA VLASTITE POTREBE

POGAVLJE I ZAJEDNIČKE ODREDBE O POSTUPKU

Član 7.
(Podnosilac zahtjeva)

Podnosioci zahtjeva za izdavanje dozvole za rad-licence za proizvodnju električne energije za vlastite potrebe mogu biti domaća i strana fizička i pravna lica, koja posjeduju postrojenja za proizvodnju električne energije i koja mogu biti podnosilac zahtjeva u smislu člana 1. stav 1. tačka a) ili b) ovog pravilnika.

Član 8.
(Podnošenje zahtjeva)

- (1) Zahtjev za izdavanje dozvole za rad – licence za proizvodnju električne energije za vlastite potrebe podnosi se na obrascu 8-ZPVP datom u Prilogu 1 ovog pravilnika.
- (2) Obrazac za podnošenje zahtjeva može se dobiti u sjedištu FERK-a ili preuzeti sa web stranice FERK-a.
- (3) Zahtjev se podnosi u pisanom obliku, ovjeren i potpisan od podnosioca zahtjeva. Zahtjev i potrebni dokumenti iz člana 21. koji se prilažu uz zahtjev trebaju se dostaviti i u elektronskom obliku koji odredi FERK za korištenje pri podnošenju zahtjeva.
- (4) Podnosilac zahtjeva dužan je platiti jednokratnu naknadu za obradu zahtjeva. Podnosilac zahtjeva obavezan je potpisati izjavu o tačnosti dostavljenih podataka.
- (5) FERK razmatra zahtjev za dozvolu samo ukoliko je zahtjev kompletan i sadrži dokumentaciju iz ovog člana.

Član 9.
(Potpun zahtjev)

Zahtjev je potpun kada su uz zahtjev podneseni svi traženi dokumenti, uplaćena jednokratna naknada za obradu zahtjeva i kada je podnositelj zahtjeva dao izjavu o tačnosti dostavljenih podataka datu pod punom krivičnom i materijalnom odgovornošću.

Član 10.
(Zahtjevi za dodatnim informacijama)

- (1) U postupku utvrđivanja činjenica o ispunjavanju uslova koji su propisani za izdavanje dozvole, FERK ima pravo provjeriti sve podatke, te po potrebi izvršiti pregled objekata, postrojenja, opreme i dokumentacije kao i tražiti dodatne informacije u bilo kojem trenutku od momenta podnošenja zahtjeva do donošenja konačnog rješenja o zahtjevu.
- (2) Podnositelj zahtjeva je dužan dostavljati podatke i informacije iz prethodnog stava u rokovima koje odredi FERK i saradivati sa FERK-om.

Član 11.
(Javna rasprava)

U postupku izdavanja dozvole, FERK može voditi opštu raspravu, formalnu raspravu i tehničku raspravu, a zadržava diskreciono pravo da odredi vrstu rasprave. Vrste javnih rasprava definisane su Poslovníkom o radu FERK-a i Pravilnikom o javnim raspravama i rješavanju zahtjeva i žalbi FERK-a.

Član 12.
(Donošenje odluka)

- (1) FERK svoju odluku donosi na redovnoj sjednici.
- (2) Odluka se donosi u pisanoj formi i sadrži obrazloženje koje pruža osnove donošenja takve odluke.
- (3) Ukoliko nije drugačije navedeno u uslovima dozvole, dozvola stupa na snagu kada je potpiše predsjednik FERK-a ili član kojeg on odredi i objavljuje se u Službenim novinama FBiH i na web stranici FERK-a.
- (4) Istovremeno, donesena odluka se dostavlja stranama u postupku.

Član 13
(Jednokratna naknada za obradu zahtjeva)

- (1) Iznos jednokratnih naknada za obradu zahtjeva po vrstama dozvola utvrđuje se posebnom odlukom FERK-a.

- (2) Jednokratna naknada se uplaćuje pri podnošenju zahtjeva za izdavanje dozvola, a dokaz o uplati prilaže se uz zahtjev.

POGLAVLJE II POSTUPAK PO ZAHTJEVU IZ ČLANA 5. STAV (1) PRAVILNIKA

Član 14.

(Obavještenje o nedostacima)

Nakon što je primljeni zahtjev pregledan, FERK će odrediti da li je primljeni zahtjev potpun. FERK šalje pisano obavještenje podnosiocu zahtjeva o ishodu pregleda zahtjeva u roku od osam dana od dana prijema zahtjeva.

Član 15.

(Nacrt dozvole-licence)

Nakon što je zahtjev primljen kao potpun u skladu sa članom 9. ovog Pravilnika, FERK usvaja nacrt dozvole ili donosi odluku da se dozvola ne izda.

Član 16.

(Obavještenje za javnost)

- (1) FERK putem svoje web stranice obavještava javnost o nacrtu dozvole.
- (2) Obavještenje sadrži i način na koji zainteresovane strane mogu dobiti informacije i uputstva zainteresovanim stranama da mogu podnijeti komentare u pisanoj formi na nacrt dozvole prije završetka roka za komentarisanje označenog u obavještenju.
- (3) Obavještenje za javnost sadrži i kriterije za sticanje statusa umješača, obavještenje da se mogu podnijeti zahtjevi za umješače i rok za podnošenje zahtjeva za umješače kao i da jedino podnosioci zahtjeva, umješači i zaposlenici FERK-a mogu učestvovati na raspravama u toku postupaka vezanih za dozvole.
- (4) Rokovi iz stava 2. i 3. ovog člana ne mogu biti duži od osam dana.
- (5) Opšta rasprava o nacrtu dozvole može se voditi i bez održavanja usmene opšte rasprave.

POGLAVLJE III POSTUPAK PO ZAHTJEVU IZ ČLANA 5. STAV (2) PRAVILNIKA

Član 17.

(Obavještenje o nedostacima)

Nakon što je primljeni zahtjev pregledan, FERK će odrediti da li je primljeni zahtjev potpun. FERK šalje pisano obavještenje podnosiocu zahtjeva o ishodu pregleda zahtjeva u roku od 30 dana od dana prijema zahtjeva.

Član 18.

(Komentari na zahtjev)

Povodom zahtjeva za izdavanje dozvole, FERK poziva zainteresovana lica da daju svoje komentare na zahtjev za dozvolu.

Član 19.

(Obavještenje za javnost)

- (1) Nakon što je zahtjev primljen kao potpun, u skladu sa članom 9. ovog pravilnika, FERK objavljuje kratko obavještenje za javnost u jednom ili više pisanih medija koji izlaze na cijeloj teritoriji Federacije BiH i na svojoj web stranici, sumirajući zahtjev za dozvolu.
- (2) Obavještenje sadrži i način na koji zainteresovane strane mogu dobiti informacije i uputstva zainteresovanim stranama da mogu podnijeti komentare u pisanoj formi na zahtjev za dozvolu prije završetka roka za komentarisanje označenog u sažetku.
- (3) Obavještenje za javnost sadrži i kriterije za sticanje statusa umješaća, obavještenje da se mogu podnijeti zahtjevi za umješāče i da jedino podnosioci zahtjeva, umješāči i zaposlenici FERK-a mogu učestvovati na raspravama u toku postupaka vezanih za dozvole.

Član 20.

(Priprema nacrtā dozvole-licence)

- (1) Na osnovu obrade zahtjeva i nakon ocjene komentara javnosti na sažetak zahtjeva za dozvolu, priprema se nacrt dozvole ili prijedlog da se dozvola ne izda.
- (2) FERK poziva zainteresovane strane da daju komentare na nacrt dozvole kroz proces javne rasprave-konsultacije.

**DIO TREĆI-POTREBNI DOKUMENTI UZ ZAHTJEV, KRITERIJI I SADRŽAJ
DOZVOLE ZA RAD-LICENCE ZA PROIZVODNJU ELEKTRIČNE ENERGIJE ZA
VLASTITE POTREBE**

Član 21. (Potrebni dokumenti)

- (1) Uz zahtjev za izdavanje dozvole za proizvodnju električne energije za vlastite potrebe obavezno se prilažu sljedeći dokumenti:
- a) rješenje o upisu u registar nadležnog organa, ukoliko je isto potrebno po posebnim propisima, odnosno lična karta i uvjerenje o državljanstvu za domaća, pasoš i boravna dozvola za strana fizička lica,
 - b) registarski i porezni broj podnosioca zahtjeva,
 - c) rješenja nadležnih organa o tehničkoj ispravnosti i bezbjednosti postrojenja (upotrebna dozvola) za proizvodna postrojenja podnosioca zahtjeva,
 - d) okolinska dozvola, ukoliko je ista potrebna po posebnim propisima,
 - e) koncesija, ukoliko je ista potrebna po posebnim propisima,
 - f) tehničke karakteristike proizvodnih postrojenja putem kojih će se obavljati proizvodnja električne energije za vlastite potrebe,
 - g) elektroenergetska saglasnost izdata od strane nadležnog distributera, za slučaj da podnosilac zahtjeva namjerava eventualne viškove proizvedene električne energije isporučivati u distributivnu mrežu,
 - h) bilo koja druga informacija koju FERK smatra, na bilo kojem stepenu postupka, potrebnom za donošenje odluke o dozvoli.

- (2) Svi dokazi se prilažu u originalu ili u ovjerenoj kopiji, s tim da ne smiju biti stariji od 60 dana.

Član 22. (Kriteriji za odluku o izdavanju dozvole za proizvodnju električne energije za vlastite potrebe)

Dozvola za proizvodnju električne energije za vlastite potrebe izdaje se podnosiocu zahtjeva koji dokaže sljedeće:

- a) da njegovo proizvodno postrojenje ispunjava sve tehničke, operativne, bezbjednosne i ostale uslove u skladu sa važećim propisima i standardima,
- b) da ispunjava sve uspostavljene kriterije za zaštitu okoline i obezbjeđuje stalnu kontrolu uticaja na okolinu.

Član 23. (Sadržaj dozvole za proizvodnju električne energije za vlastite potrebe)

U dozvoli za rad-licenci za proizvodnju električne energije za vlastite potrebe biće definisano sljedeće:

- a) puni naziv, adresa, brojevi telefona, fax-a, e-mail adresa,
- b) period važenja dozvole,

- c) tačna lokacija proizvodnog postrojenja,
- d) tehnički opis proizvodnog postrojenja,
- e) mjesto isporuke električne energije, ukoliko se isporučuje u distributivnu mrežu,
- f) u dozvoli će biti definisano da je imalac dozvole dužan da se pridržava važećih zakona, izdatih dozvola i saglasnosti, tehničkih propisa i standarda,
- g) dozvolom će biti definisana i kontrola i nadgledanje obavljanja licencirane djelatnosti,
- h) posebno poglavlje u dozvoli će biti posvećeno obavezama u vezi zaštite okoline,
- i) bilo koji drugi uslov ili zahtjev za koji FERK smatra da je prikladan da bi ispunili ciljeve Zakona i propisa FERK-a, odnosno da bi se ispunili zahtjevi u slučaju kvalifikovanih proizvođača koji koriste obnovljive izvore energije (vjetrolektrane, solarne elektrane, korištenje biomase i sl.).

DIO ČETVRTI-IZMJENE, DOPUNE, ODUZIMANJE I ODBIJANJE DOZVOLE

Član 24.

(Razlozi za odbijanje zahtjeva za dozvolu za rad-licencu)

Podnosiocu neće biti izdata dozvola u sljedećim slučajevima:

- a) ukoliko je zahtjev nepotpun,
- b) ukoliko podnosilac zahtjeva ne ispunjava kriterije iz člana 22. ovog pravilnika,
- c) ukoliko podnosilac zahtjeva ne ispunjava uslove iz elektroenergetske saglasnosti.

Član 25.

(Izmjene i dopune dozvole)

(1) Postupak izmjene i dopune dozvole može biti iniciran na zahtjev imaoца dozvole ili na vlastitu inicijativu FERK-a.

(2) Izmjene i dopune će se tražiti u sljedećim slučajevima:

- a) značajnih izmjena u pravnom okviru, sudskim odlukama, dešavanjima ili ugovorima koji imaju uticaja na proizvodnju električne energije,
- b) u uslovima u kojima imalac dozvole nema kontrolu i pod kojima je ispunjenje uslova iz dozvole nemoguće (npr. viša sila, havarija na elektroenergetskom objektu),
- c) FERK može započeti postupak ponovnog otvaranja i izmjena i dopuna važeće dozvole da bi odgovorio na promjene u Zakonu ili FERK-ovim pravilima, ili činjeničnim okolnostima, da bi se zaštitio opšti javni interes.

(3) Postupak izmjene i dopune dozvola se obavlja na isti način kao i postupak izdavanja dozvola.

Član 26.
(Oduzimanje dozvole)

- (1) FERK će oduzeti dozvolu ukoliko:
- a) imalac dozvole ne poštuje uslove i rokove postavljene dozvolom,
 - b) imalac dozvole odluči da ne obavlja odobrenu djelatnost proizvodnje električne energije za vlastite potrebe, o čemu je dužan prethodno obavijestiti FERK,
 - c) imalac dozvole, u toku obavljanja licencirane djelatnosti, ne podnese tražene podatke i informacije FERK-u,
 - d) imalac dozvole namjerno podnese netačne podatke i informacije FERK-u,
 - e) imalac dozvole ne omogući FERK-u direktan pristup opremi i dokumentaciji.
- (2) Postupak za oduzimanje dozvole se obavlja na isti način kao i postupak za izdavanje dozvole. Postupku oduzimanja dozvole prethodi pisana opomena FERK-a. Nakon što FERK primi odgovor na opomenu od imaooca dozvole, ili isti ne odgovori u roku koji odredi FERK, provodi se postupak oduzimanja dozvole. Ukoliko u toku postupka, imalac dozvole ispuni propisane uslove za obavljanje djelatnosti, FERK može obustaviti postupak oduzimanja dozvole.

DIO PETI - REGISTAR DOZVOLA

Član 27.
(Registar dozvola)

- (1) FERK vodi registar dozvola za proizvodnju električne energije za vlastite potrebe
- (2) Registar se sastoji od svih spisa (predmeta) koji obuhvataju sve akte i priloge koji se odnose na isto pitanje i čine posebnu cjelinu.
- (3) Registarski spis sadrži :
- a) zahtjev za izdavanje dozvole za obavljanje licencirane djelatnosti,
 - b) dokumente i priloge koji se podnose uz zahtjev za izdavanje dozvole,
 - c) dokumente vezane za javne rasprave,
 - d) rješenje po zahtjevu,
 - e) dozvolu za obavljanje licencirane djelatnosti,
 - f) rješenje o izmjenama i dopunama ili oduzimanju dozvole,
 - g) pravni lijek nadležnim organima na odluke FERK-a.
- (4) FERK vodi zbirni registar u elektronskoj formi koji sadržava sljedeće podatke:
- a) registarski broj dozvole,
 - b) naziv i sjedište imaooca dozvole,
 - c) datum upisa u registar dozvola,
 - d) identifikacioni broj imaooca dozvole,
 - e) datum izdavanja dozvole,

- f) datum isteka dozvole,
- g) datum donošenja rješenja o izmjenama, dopunama ili oduzimanju dozvole.

(5) FERK stavlja na raspolaganje javnosti, radi davanja na uvid i kopiranja, sve dokumente, koji se tiču njegove nadležnosti izdavanja dozvola, osim povjerljivih informacija, u skladu sa pravilima FERK-a.

(6) FERK sačinjava listu svih dozvola koje čekaju na postupak, a po kojima nije odlučivano, vremenski period za koji su dozvole čekale i procjenu perioda za odlučivanje po svakoj pojedinačnoj dozvoli.

Član 28.

(Sadržaj obavještenja za Službene novine FBiH)

FERK objavljuje dozvolu u „Službenim novinama FBiH“. Obavještenje sadrži:

- a) naziv i sjedište imaoca dozvole i ime odgovorne osobe,
- b) registarski broj, datum izdavanja i period važenja dozvole,
- c) opis licencirane djelatnosti za koju je dozvola izdata,
- d) kratki sadržaj dozvole, tj. izmjene, dopune ili oduzimanje dozvole.

DIO ŠESTI- NADGLEDANJE

Član 29.

(Uslovi nadgledanja)

- (1) FERK nadgleda obavljanje licencirane djelatnosti.
- (2) Imalac dozvole je dužan saradivati sa FERK-om u smislu pružanja svih podataka koje FERK traži u toku vremenskog perioda za koji je dozvola izdata.
- (3) FERK može izvršiti i fizičku inspekciju postrojenja i dokumenata vezanih za dozvolu (periodično najavljene i nenajavljene posjete).
- (4) FERK nadgleda sve aspekte usaglašavanja imaoca dozvole sa uslovima dozvole, kao i svim odredbama i pravilima FERK-a.
- (5) FERK nadgleda pridržavanje imaoca dozvole uslova dozvole i FERK-ovih pravila.

Član 30.

(Sankcije)

- (1) Ukoliko se utvrdi da se imalac dozvole ne pridržava uslova iz iste, FERK ga opominje u pisanoj formi i određuje rokove za otklanjanje nedostataka.

- (2) Ako imalac dozvole ni nakon opomene ne postupi po uslovima iz dozvole, FERK primijenjuje kaznene odredbe Zakona.
- (3) U slučajevima težih povreda uslova iz dozvole, odredbi Zakona i ovog pravilnika, FERK pokreće aktivnosti vezane za oduzimanje dozvole.

DIO SEDMI - PRELAZNE I ZAVRŠNE ODREDBE

Član 31. (Prelazni period)

Lica koja posjeduju elektroenergetska postrojenja za proizvodnju električne energije za vlastite potrebe instalisane snage do 23 kW koji se priključuju na niskonaponsku mrežu i imaju namjeru eventualne viškove proizvedene električne energije isporučivati u mrežu, dužna su podnijeti zahtjev za izdavanje dozvole shodno ovom pravilniku, u roku od jedne godine od stupanja na snagu ovog pravilnika.

Član 32. (Konačnost)

- (1) Pojedinačni akti koje donosi FERK su konačni.
- (2) Protiv pojedinačnih akata FERK-a stranka može pokrenuti upravni spor kod nadležnog suda.

Član 33. (Prilozi)

Sastavni dio ovog pravilnika su prilozi i to:
Prilog 1, koji sadrži obrasce za podnošenje zahtjeva za dozvolu (8-ZVVP),
Prilog 2, koji sadrži izjave o tačnosti podataka.

Član 34. (Tumačenje pravilnika)

Tumačenje odredbi ovog pravilnika daje FERK.

Član 35. (Stupanje na snagu)

Ovaj pravilnik stupa na snagu osmog dana nakon objavljivanja u „Službenim novinama Federacije BiH“.

Br. : 01-07-363-02/09
Mostar, 08.04.2009.godine

**Predsjednica FERK-a
Đulizara Hadžimustafić**